

吳伯雄
編

陳壽祺全集

36



廣陵書社

陳壽祺全集



廣陵書社

第三十六冊

卷百七十六 宋人物 列傳泉州……………	一
卷百七十七 宋人物 列傳南劍州……………	一〇七
卷百七十八 宋人物 列傳漳州汀州……………	一六五
卷百七十九 宋人物 列傳邵武軍……………	一九九
卷百八十 宋人物 列傳興化軍（一）……………	三〇一
卷百八十一 宋人物 列傳興化軍（二）……………	四三五

重纂福建通志卷之百七十六

人物

宋泉州列傳

晉江縣陳從易

孫孝則曾孫穎

陳詒

子汝義從子汝爽

曾公亮

子孝寬

呂

夏卿

子科

曾孝廣

從子誕

曾孝蘊

子浩

韓謹

曾懷

劉敏

求

傅自得

徐定

梁克家

子億

李綸

兄縝

陳研

陳樸

弟模

石起宗

曾植

楊炳

子寅翁

趙庚

儲用

子擢

李沈

趙不慢

曾從龍

弟用虎治鳳

劉用行

趙時煥

呂中

南

安縣劉昌言

孫壽

柯述

子煜

知彰

諸葛廷瑞

子直清

同安縣

蘇紳

子悅

蘇頌

子嘉

師德

曾孫玘

劉達

吳燧

永春縣黃維

之

子以寧

以

正

子恭

元英

丙

鑄

碩

恭子元剛

鑄

元亮 陳一新 安溪縣余克濟 邱迪嘉 子汲古

晉江縣

陳從易字簡夫端拱二年進士爲嵐州團練推官再調彭州軍事判官軍賊王均反從易攝州事有謀殺兵馬都監以應均者從易捕首謀斬之及綿漢相繼陷均移書至州從易焚之以安眾率將吏嚴守備且戒家僮積薪堂後曰吾力不足以守則死此賊聞有備不入境改知邵武軍召爲著作佐郎大中祥符二年除監察御史嘗召對崇和殿命同祕閣校理劉筠卽席賦瑞雪歌祀汾陰詩真宗稱善與筠竝賜緋魚擢殿中侍御史改刑部員外郎直史館出知虔州會歲饑有持杖發民困倉者從易請一切減死論凡全活者千餘人歲大稔流民歸業歌曰春來活得千人命秋後還收

數倍禾未幾召歸仍直史館天禧三年以父老求鄉郡宰相寇準惡其疏已除知吉州從易因對自陳乃改福州未行遭父喪服除糾察在京刑獄乾興元年出爲荆湖南路轉運使時寇準方貶道州丁謂語從易曰廬陵之事可以釋憾矣從易對曰當以故相事之耳謂有媿色王欽若素善從易及廢居南京人以謂故無敢往見者從易至湖南見欽若欽若曰無乃爲君累乎從易不爲意畱數日而去天聖初王欽若再相會廣州缺守仁宗謂輔臣曰此邦控制海外諸國寶貨所聚前爲守者多不稱職宜遴其人欽若曰陳從易有清節可使也三年二月再加太常少卿直昭文閣知廣州七年入爲左司郎中與楊大雅竝知制誥仁宗以從易廉謹御書飛白清字賜之自景德後學者多宗楊億以雕靡相尙從易深

擯億學與大雅以好古自守時謂之楊陳體已而兼史館脩撰遷左諫議大夫進龍圖閣直學士知杭州卒年六十從易敷歷中外不苟取毫末喪父時以貧故賻贈一無所拒及自廣州歸取俸餘剩錢半以償賻贈半以頒宗族之貧者後元豐閒從易外孫蘇頌爲集賢院學士嘗言於神宗曰臣外祖陳從易天聖閒以直昭文館知廣州罷還不輦南物惟輦俸餘錢過嶺神宗曰清過於馬援矣孫孝則知柔知柔見儒林傳 孝則字永仲宣和三年進士調廣州東莞縣尉獲寇不受賞以薦改秩通判潮州納苗賦令民自槩量擢知英州奏罷涵口稅場人便之除廣南東路提點刑獄有盜繫獄賂守獄者逸去誣繫他舶商孝則驗其冤釋之後十餘年舶商至泉輒望廬而拜焉晚取仁宗飛白賜其先人之義自名所

居曰清室卒年八十有三郡守王十朋哭以詩云心勞撫字陽司業獄喜平反雋不疑人以爲實錄子穎 穎字奇之以父孝則蔭入官廉謹世其家歷知潮州海陽縣盡蠲無名賦尋通判興化軍再徙知惠州妖覲嘯徒策日爲變帥臣欲以兵捕之穎謂捕則堅其必死之日不若撫之使定竟就招遷提舉廣東市舶

陳詒字天經父在中字繇夫博學通經尤深於易景德四年進所著六十四卦賦賜釋褐不仕詒登大中祥符元年進士天聖初同知太常禮院奏言蜡祭一百九十二位而祝文乃載一百八十二位其五方田畯五方郵表畷十位皆闕與開元禮不合郊祀正辭錄竝司天監神位圖蜡祭貓虎皆以虎爲於菟蓋由唐初避諱而改請自今仍稱爲虎祝文五方眾族之下增入田畯郵表畷又言

記謂八蜡以祀四方年不順成八蜡不通歷代蜡祭獨在南郊爲一壇惟周隋四郊之兆乃合禮意月令以蜡與息民爲二祭故隋唐息民祭在蜡之後日請蜡祭四郊各爲一壇以祀其方之神有不順成之方則不脩報其息民祭仍在蜡祭之後詔皆從之尋遷祠部員外郎出知祥符縣詔爲治嚴急不少假吏畏之欲動朝廷使罪詬空一縣逃去明肅太后果怒詬妻宰相呂夷簡妹也執政以嫌不敢辨事下樞密院副使陳堯佐爭曰罪詬則奸吏得計後誰敢復繩吏者詬由是獲免遷三司戶部副使兵部員外郎卒累贈兵部尙書子汝羲從子汝夷 汝羲皇祐五年登進士治平中厯官祠部郎中提點開封府界諸縣鎮公事擢判三司都磨勘神宗卽位新提點府界羅愷入見神宗問以開封事不能對及問汝

義答應詳敏翼曰謂執政曰愷不才宜復用汝義代之執政言汝義資序已高復爲提點則下遷宜但令試館職而已遂除汝義直史館熙寧中累轉三司戶部判官 汝爽字公武詒從子也徙居丹徒寶元元年登第歷知邵武軍後知海州歲饑發賑不俟報爲監司所劾汝爽請以身坐母累僚屬朝廷嘉之置不問及母歿歎曰不及養矣遂家居不復出

曾公亮字明仲父會端拱二年進士第二人授光祿寺丞直史館以親老丐補郡遷殿中丞知宣州大中祥符末由三司判官出爲兩浙轉運使丁謂興錢塘捍江之役發卒萬餘斬木伐石傾蕩山谷會時已解漕職奏列其狀有旨中罷仕終刑部郎中集賢殿修撰知明州公亮以父蔭授大理評事天聖二年登進士遷奉禮郎

知越州會稽縣鏡湖常水溢爲民田惠公亮立陡門泄水入曹娥江田獲利而父會稍買爲產公亮坐是謫監湖州酒稅慶厯七年累擢天章閣待制兼侍講賜三品服故事待制入謝未始賜服至是仁宗御邇英閣講孝經面諭之曰朕卽講席賜卿所以尊寵儒臣也一日仁宗召執政侍從策訪政事會公亮以母病在告仁宗手詔遣內侍就問公亮條六事以獻略言完堡棚蓄兵馬使主兵者久於其任則夷狄不敢窺邊取之得其要任之盡其材則將帥不患無人損冗兵汰濫官則財用足省徭役專任農則耕者勸復陳宿衛之失及聽言知人之難皆取當時所急而便於施行者仁宗嘉納之皇祐三年拜翰林學士管勾三班院三班吏非賅謝不行抱文書升堂取判者高下在口公亮盡取前後條目置坐側案

以從事吏束手無能爲除端明殿學士知鄭州盜悉竄他境夜戶不閉鄭人號爲曾開門有使客亡橐中物移文詰盜公亮報曰吾境不藏盜殆從者之廢也索之果然嘉祐元年擢給事中參知政事三年加檢校太傅禮部侍郎五年依前官除樞密副使兼羣牧制置使六年行吏部侍郎拜同中書門下平章事集賢殿大學士公亮明練文法習知朝廷臺閣典憲首相韓琦多咨訪焉每得四方奏獄必躬閱之密州奏盜有發民田銀砂者大理當以強論死公亮曰此禁物也取之雖強與盜物民家有聞矣固爭之下有司議比竊禁物法得不死著爲例契丹縱人漁界河又疏通鹽舟吏恐生事不敢校公亮言萌芽不禁後將奈何遣雄州趙滋諭以旨意邊患遂息時仁宗春秋高琦請建儲副與公亮共定大議英宗

卽位加中書侍郎兼禮部尙書治平元年遷戶部尙書四年正月
遼賀正使在館故事賜宴紫宸殿會英宗不豫命公亮就館宴之
使者不肯赴公亮責之曰賜宴不赴是不虔君命也人主有疾而
必使親臨處之安乎使者乃就席神宗立除行門下侍郎兼吏部
尙書封英國公尋加尙書左僕射改封兗國公熙寧二年加昭文
館大學士進封魯國公初公亮力薦王安石文學器業宜膺大用
及安石爲參知政事置條例司更張舊法公亮知神宗嚮用安石
嘗使子孝寬參其謀然亦陽持正論以示若不與之同者安石至
厲聲與之往返由是言者亦以安石爲專而公亮不與也蘇軾嘗
從容責公亮不能救正朝廷公亮曰上與安石如一人此乃天也
三年八月御史知雜事謝景溫因劾龍圖閣直學士張揆年老不

退以警公亮猶未決逾月神宗御集英殿冊進士移寓需雲閣便坐延輔臣賜茶公亮陟降殿陛仆於地神宗命左右掖起之明日引疾求罷拜司空檢校太師兼侍中領河陽三城節度使集禧觀使仍五日一奉朝請四年起判永興軍先是慶州卒叛已伏誅而餘黨散逸自陝以西皆警備公亮曰叛者誅矣胡乃張皇若是次第奏罷之長安豪右造飛語聲言營卒怨減削謀以上元夜結外寇爲亂民大恐亮率賓佐張燈置酒縱觀城市竟夕而歸飛語遂息神宗聞之謂安石曰大臣如公亮極不可得也會公亮乞還闕許之明年除守太傅致仕元豐元年卒年八十神宗臨哭輟朝三日贈太師中書令配享英宗廟廷謚宣靖及葬恩禮視韓琦御篆其碑首曰兩朝顧命定策亞勳之碑神宗嘗語輔臣曰公亮謹重

周密內外無閒受遺輔政有始有卒可方漢張安世其見重如此然陰助安石而排富弼韓琦爲世所譏御史中丞呂誨引章辟光離閒岐嘉二王之言以攻安石誨坐罷出知鄧州知制誥蘇頌當制公亮召頌諭曰辟光治平四年上書介甫猶在金陵安得而教之頌遂據以命詞然辟光治平四年所上乃言他事非論二王也制出土大夫頗以爲非頌深悔之嘗謂人曰介甫雖黜逐我我怨之不若魯公之深也始尙書省議諡公亮忠獻禮官劉摯駁曰丞相位歷三朝不聞拔一士安得謂之忠家累萬金未嘗濟一物安得謂之獻眾不能奪其議乃改宣靖云子孝寬孝宗孝純 孝寬字令綽東都事略作公綽 蔭授將作監主簿歷知開封府咸平縣民詣府訴雨傷麥府以妄杖之孝寬躬行田辨其實得蠲賦熙寧初除判

登聞鼓院言者彈奏大臣子弟不宜居要職公亮亦自陳乞閒慢局務乃令監皮角場三年詔曾公亮諸子依韓琦例推恩除孝寬

祕閣校理

宋史本傳作祕閣修撰

提點開封府界諸縣鎮事時方行保甲法

鄉民驚擾多自傷殘以避團練孝寬出榜募告扇惑者民由是不敢訴累除起居舍人充史館修撰兼樞密院都承旨承旨用文臣兼領自孝寬始未幾奉命察訪河東路義勇利害孝寬根括河外荒地七百餘頃以招弓箭手還朝拜龍圖閣待制同領羣牧使六年出爲河北路察訪使初孝寬建議廢八監以牧田賦民募耕增課馬政漸弛至是復請於河北行戶馬法令坊郭第三等鄉村第二等每戶養被甲馬一匹在府界免輸糧草二百五十束在五路歲免折變緣納錢詔從其請然自新法行百姓困於科斂率爭領

戶馬以免徭役其後馬斃賠償有司務爲苛追民益不勝其擾矣
八年擢龍圖閣直學士契丹遣使爭代北地神宗遣孝寬往河東
分畫地界孝寬以圖籍按視而竝邊未嘗侵北境乃奏曰國家所
以待外國者恩與信也恩不可使濫信不可使失苟細事不較將
有大於此者宜如故便十二月拜樞密直學士同簽書樞密院事
丁父憂服闋除端明殿學士知河陽府宋史職官志云端明殿學士在翰林學士之下自明
道訖元豐無前執政爲之僅以待學士之久
次者元豐中以前執政爲之自曾孝寬始
三年四月入朝畱判
司農寺九月出知陳州四年改知秦州會王師討西夏議者欲徙
秦鳳兵屬熙河孝寬言州直邊衝兵不可徙徙之未幾徙知鄆州
鄆有孟子廟而無封爵孝寬請於朝得封鄒國公配享孔子廟六
年召爲吏部尙書八年除資政殿學士知潁昌府元祐五年六月